

DE
**SYSTEMATE NERVEO PIS-
CIUM CONSIDERATIONES.**

**DISSERTATIO
INAUGURALIS ZOOTOMICA**
TABULIS DUABUS LITHOGRAPHICIS ILLUSTRATA,

QUAM
CONSENSU ATQUE AUCTORITATE AMPLISSIMI
MEDICORUM ORDINIS

IN
CAESAREA UNIVERSITATE LITTERARUM DORPATENSIL

UT
SUMMOS IN MEDICINA MONORES

RITE ADIPISCATUR,

LOCO CONSUETO PUBLICE DEFENDET

AUCTOR

Alexander Zagorsky,
PETROPOLITANUS.



*Caesareae Academiae scientiarum Petropolitanae
alumnus.*

Dorpati Livonorum.
TYPIS J. C. SCHUENMANNI, TYPOGRAPHI ACADEMICI.

MDCCXXXIII.

VIRO

DOCTISSIMO, EXPERIENTISSIMO, ILLUSTRISSIMO,
PRAECEPTORI CARISSIMO

IMPRIMATUR

haec dissertatio ea conditione, ut quum primum ex officina emissa fuerit, quinque
eius exempla collegio explorandis libris constituto tradantur.

Dorpati Livonorum d. XV. mens. Jul. MDCCCXXXIII.

Dr. FRIDERICUS ERDMANN,
Ord. Med. h. t. Decanus.

HENRICO RATHKE

HAS STUDIORUM PRIMITIAS

D. D. D.

Auctor.

PRO O E M I U M .

Ad nervosum systema, totius organismi animalis nobilissimum, quod inter psychicam organismi et somaticam sphaeram quasi medium est; cuius ope animus rebus externis et ipse afficitur, et voluntatis vim in varia organa exercet, nullis temporibus non attentissimum naturae scrutatores et praecipue medici, animum retulerunt. Nihilominus tamen, hujus systematis functiones, per longum tempus densissimis obductae tenebris jacuerunt, summâ curâ, atque industriâ, a doctissimis viris ad eas explicandas incassum adhibitâ; nam donec in homine tantum systematis nervosi organa centralia, quae, sumnum in eo perfectionis gradum assecuta, propter multiplicem formam, nec non structuram magis compositam, obscura semper permanserunt, scrutari a physiologis satis habitum fuit, — cum de cujusque partis vi et significatione, tum de omnibus systematis hujus functionibus vix certi quidquam colligere fas erat.

Jam physiologia demum, anatomiae comparatae studio diligentiori, magna et vix credibilia incrementa cepit; nam animalia, varios regni animalis gradus occupantia, considerantes, organa, in perfectioribus magnopere composita, in inferioris ordinis animalibus simpliciora invenimus, ita ut functiones eorum atque vim, nec non mutuam rationem, facilius accuratiusque definire possimus.

Neque semper in sola contemplatione, atque anatomica organorum perquisitione acquiescendum est; quin etiam in vivis animalibus nonnunquam pericula facere oportet, ut de munere cujuscunque organi aut apparatus certiores reddamur; quod in inferioris ordinis, simpliciorisque organismi animalibus facilius perfici potest, quam in perfectioribus, quorum varia systemata tam arte inter se cohaerent, ut, si eorum uni vim inferas, totius organismi concentrum destruas et nunquam ad propositum pervenias.

Praeclare quoque novissimis demum temporibus animalium fetuum evolutionis historia de anatomia comparata et physiologia est merita, nam, quum in organorum origine contemplandā et indagandā versetur, et dum ea gradatim sese evolventia investigat, interiorē etiam eorum naturam explicat, veramque aperit analogiam inter organa, inter quae, nisi ipsā duce, saepe ne ulla similitudo fingi posset.

His praemissis, neminem, spero, fore, qui contendat, systematis nervei piscium considerationem, laborem omnino inutilem esse. Sane, tali argūmento tironis vires vix pares erunt; nam, praeter anatomiae comparatae cognitionem profundiorē, talem laborem suscepturum oculo acutiore, manuque, in sectionibus anatomie subtilioribus, qualis est nervorum præparatio, exercitatā gaudere oportet: — quae mihi quam sint exigua, probe sentiens, Lectorem benevolum, ut laborem meum cam indulgentiā dijudicet, rogo.

Quod vero piscium anatomen attinet, illa cum ceteris zootomiae partibus haud pari passu progrediebatur, ita ut Bakker (1) „per integrum et quod excurrit seculum decimum septimum, in immensa florentissimae jam zootomiae universae silva, piscium sere anatomen exsulare“ — contendat. Nevrologia eorum eo minus colebatur.

Neque nostris temporibus multi de hoc argūmento scripserunt auctores; ac quae apud plures eorum de piscium systemate nerveo leguntur, modo singulas systematis partes tangunt, modo generales atque leves præbent de hac re considerationes, ita ut totius systematis nervei piscium expositio accuratio latiorque apud eos desideretur; accedit quoque, quod saepissime illi inter se dissentient, quod præcipue in denominandis singulis piscium cerebri partibus, determinandāque earum significatione occurrit, parimodo in exponendis nervorum origine et decursū.

Haec erant in causis, ut in describendis diversis systematis nervei apud pisces partibus et præcipue nervis, propriis potius, non numerosis quamvis, sed non sine multā operā factis piscium sectionibus sim usus, at-

1) Gerbrandi Bakker osteographia piscium. pag. 2.

que observationes meas cum observationibus eorum, qui de hoc argūmento scripserunt, auctorum tantummodo comparare studuerim.

Accuratius systema nerveum *esocis lucii* indagare et describere curavi; alios pisces comparandi causa secui; cum vero nonnulli eorum jam per longum tempus in spiritu vini servarentur, atque eo ipso ex parte correpti essent, nervos, præcipue vero ipsorum cerebrum, quod et recens, ob nimiam mollitiem, exploratu valde est difficile, diligentius perscrutari operam mihi nequidquam dabam, quo factum est, ut non in omnibus piscibus, quos secui, omnes systematis nervei partes inspicere atque commemorare potuerim.

Pisces, a me secti, sequuntur:

Acipenser Giildenstaedtii

— *ruthenus*

— *stellatus*

Cottus scorpius

Cyclopterus lumpus

Cyprinus brama

— *tinca*

Esox lucius

— *bellone*

Gadus callarias

Muraena anguilla

Perca fluviatilis

— *cernua*

Pleuronectes flesus

Salmo Wartmanni

Squalus catula

— *stellaris.*

Tabulas, quas dissertatiunculae huic subjeci, ad naturam ex præparatis, a me confectis, depinxi; quas licet minus nitide quis elaboratas forte censem, at verissime ad naturam delineatas inveniet.

CENTRALIA SYSTEMATIS NERVEI APUD PISCES ORGANA, CEREBRUM ET MEDULLA SPINALIS. (2)

Generalia quaedam praemittenda sunt.

Cerebrum piscium, ex nodulorum serie constans, quorum forma et struc-
tura, aequae variae ac ipse numerus observantur, cavitatem cranii rarissime
omni ex parte explet, sacpius vero magnâ substantiae gelatinoso — oleosae
copiâ circumdatur, quae spatium inter piam ac duram matrem occupans,
membranae arachnoideae locum tenere videtur. Massa encephali, corporis
totius ratione admodum est parva, ut in cyprino carpione, qui ceterum ma-
ximo inter pisces gaudet cerebro, pondus hujus ad totius corporis pondus
ut 1:560 sese habeat; in scombro thynno vero ut 1 ad 37440. (3)

Quod vero substantiam cerebri apud pisces attinet, illa tam est mollis
ut saepe sub cultro anatomico deliquescat, vel fortissimo vini spiritu, ad
eam condensandam, adhibito.

2) Collins in libro suo: *A system of anatomy relating of the body of man, beasts etc. tabulas, cerebrum multorum piscium exhibentes, dedit.*

Camper: de aure piscium in Mémoires des savans étrangers présentés
à l'Academie des sciences de Paris T. VI. etiam cerebrum piscium descripsit.

Haller: Elementa physiol. T. IV. pag. 591. de cerebro piscium loqui-
tur, nec non in operibus suis minoribus. T. III.

Vicq - d'azyr. parimodo in Mémoires des savans étrangers cet. T. VII.
nonnullas de piscium cerebro observationes communicavit.

Cuvier Leçons d'anatomie comparée. T. II. et

Cuvier et Valenciennes: histoire naturelle des poissons. T. I.

Arsaky in dissertatione sua „de cerebro et medulla spinali piscium“,
multa de hoc arguento collegit et edidit.

A. Monro: Vergleich des Baues der Fische etc. — etiam de systemate
nervico piscium loquitur.

M. G. R. Treviranus: Untersuchungen über den Bau und die Funktionen
des Gehirns; etiam in: Zeitschrift für Physiologie von Treviranus. B. IV. H. I.

Serres: Anatomie comparée du cerveau.

Carus: Versuch einer Darstellung des Nervensystems; nec non in: Lehr-
buch der Zootomie.

3) Cuvier Leçons d'anatom. comp. T. II. pag. 152.

Utut varia est piscium encephali conformatio, tamen diversae illae
formae ad unam generalem facile reducentur, si modo singulas, ex quibus
cerebrum componitur, partes, accuratius consideremus.

Tres enim principales ac distinctae in quovis piscium cerebro obser-
vantur partes, quae modo in forma sua ac volumine variant, nunquam vero
desiderantur ac facile inter se distinguuntur.

Pars anterior, lobi anteriores s. olfactorii (4), nervis olfactoriis origi-
ginem praebens, quam maximas apud varios pisces offert varietates; nam
modo ex uno integro, atque insignis voluminis constat lobo, ut hoc apud
chondropterygios observatur pisces; modo ex uno nodulorum pari componi-
tur, quae commissura junguntur, atque saepe conspicuos in superficie sua habent
gyros, — quae hujus partis conformatio apud majores osseos pisces inveni-
nit nec non apud branchiostegos; nonnunquam vero tria nodulorum paria
hanc piscium cerebri partem constituunt, ut in muraenis.

Constat haec pars substantia cinerea, atque massam integrum exhibit,
exceptis: *squalo catulo* et *carcharid*, quorum lobus anterior, secundum Ar-
saky, ventriculum continet, cum ventriculo partis mediae communicantem.

Pars media, lobi medii s. optici (5), eaque semper fere ceteris major,
uno constat tuberculorum pari, formamque ovalem exhibit; non raro
ambo tubercula in unum coalescant, quod longitudinali tantummodo sulco

4) Haller: tubercula olfactoria anteriores.

Cuvier: noeuds des nerfs olfactifs — etiam: lobes antérieurs.

Arsaky Hemisphaeria cerebri.

Treviranus: Hemisphaeria anteriora.

Serres: ex comparatione cerebri piscini cum eo fetuum mammalium, par-
tem hanc nonvisi haemisphaeria mammalium, modo minus evoluta, esse de-
ducit, cui opinioni Carus quoque accedit, atque partem hanc: *nervi ol-*
factorii ganglia nominat.

5) Camper: Hemisphaeria.

Haller: thalamus opticus.

Cuvier: lobes creux.

Treviranus: Hemisphaeria posteriora.

Arsaky, Desmoulin et Serres: eminentia quadrigemina mammalium
magis evoluta.

Carus: Sehhügel.

in superficie externa in duos lobos dividitur. Pars haec etiam magis compositam ostendit internam structuram, nam in ventriculo suo, et quidem in fundo, eminentias semicirculares, nec non tubercula (6) continet, quorum numerus, forma, nec non magnitudo variare solent, ita ut saepe maxima cum internis hemisphaeriorum mammalium organis, similitudo observetur. (7)

In inferiore partis hujus facie nervi optici in conspectum veniunt, nec non eminentiae peculiares, substantiae cinereae, numero saepe tres (8), quarum cum media, gracillimi styli ope, glandula pituitaria cohaeret. Medii cerebri lobi cum anterioribus uniuntur in inferiore parte fasciculorum medullarium ope, qui e medulla spinali proveniunt, atque non nisi columnae ipsius inferiores prolongatae sunt.

Constat haec pars ex medullare et corticali substantia quae vario modo sunt dispositae. Tegmentum ventricularum, sive externa pars, quae putaminis ad instar organa interna obducit, duo distincta ostendit strata, externum, substantiae corticalis, internum vero, medullaris; tubercula interna ex cinerea constant substantia.

Praeter nervum opticum proveniunt ex hac cerebri portione nervi oculomotorii et trochleares.

Tertia cerebri piscium pars, cerebellum (9), cum simili organo cerebri

6) *Haller: cornua ammonis.*

Camper: tubercula quadrigemina.

Cuvier: in eminentiis semicircularibus, corporum striatorum analoga agnoscit, ganglia vero cum tuberculis quadrigeminis mammalium comparat.

Treviranus: tubercula quadrigemina.

Carus: ganglia interna colliculi optici.

7) *Carus: (Versuch einer Darstell. pag. 155.) organa haec in cerebro clupeae harengi descriptis.*

8) *Arsaky: glandula pituitaria ipsa.*

Carus: ganglia hypophyseos cerebri.

Cuvier: eas cum thalamis opticis comparat, medium pro glandula pituitaria tenens.

Camper et Treviranus: eminentiae mammilares.

Haller: tubercula olfactoria inferiora.

9) In hoc organo denominando omnes auctores inter se conveniunt. *Carus* illud etiam ganglion medullae spinalis esse dicit.

mammalium magnam praebet analogiam, nam lobum imparem sistens, ventriculo medullae oblongatae impositum, cruribus anterioribus et posterioribus cum columnis medullaribus cohaeret, constatque e substantia corticali, in qua media cavum deprehenditur, quod cum ventriculo medullae oblongatae, sic dicto quarto, communicare solet.

Forma atque volumen cerebelli apud pisces multum variant. Interdum trabeculae transversalis ad instar commissuram potius inter laterales ventriculi quarti parietes sistit — ut apud *cyclostomata*, nec non *sturiones* (*Cuvier, Carus*); apud illa, pars haec tam est parva, ut plane deficere videatur; interdum vero, atque multo saepius ovalem exhibit formam, atque non raro laterales habet variae formae et voluminis appendices, quod apud plures osseos occurrit pisces; in *chondropterygiis* lamellam, ventriculum quartum tegentem, plicisque transversalibus instructam, sistit.

Tres illae supradictae partes, sane plus minusve evolutae (10), in quovis piscium cerebro observantur; sed praeter eas non raro alia quoque reperiuntur tubercula, quae pone cerebellum collocata, lobi posteriores a *Cuvier* dicuntur; forma eorum varia; nam modo intumescentias ventriculi quarti ad latera exhibent, quae origini nervorum trigeminorum nec non vagorum respondere videntur, — modo e peculiaribus constant nodulis in fundo ventriculi quarti collocatis, qui apud *cyprinos* compositam ostendunt structuram. (11)

His, quae ad structuram cerebri piscium rite cognoscendam, necessaria a me credebantur, praemissis, ad cerebrum apud *esocem lucium* descriendum, accedamus.

Cranio aperto, massam eam gelatinoso - oleosam sub dura matre in sat magna copia invenimus; (plus ejus reperitur apud *Salmonem* *Wartmanni*, multo plus apud *cyprinos*; apud *sturiones* vero, illa adipis consistentiam habens posteriores cerebri partes nec non totam medullam oblongatam cum

10) Prout ea vel altera harum partium prae ceteris evolvitur, claris. *Carus* tres cardinales piscium cerebri formas distinguit: Versuch einer Darstellung etc. pag. 161.

11) *Haller* nodulos istos incongruis designit nominibus; par anterior ei *pons mammillaris* dicitur, par posterior *tubercula striata*, et tuberculum medium — *glandula pinealis*. (l. c. pag. 594.)

nervis ex illa provenientibus circumdat). Cerebrum ipsum tunica semipellucida vasculosa investitur, quae, pigmento nigro scatens, cava cerebri penetrat ibique plexus choroideos formare videtur.

In cerebro *esocis lucii* tres illae supramemoratae partes facile distinguuntur.

Lobi anteriores duobus constant nodolorum paribus (Tab. I. fig. I. II et III. a. α .) quorum anteriores (α) posteriobus minores, sensim sensimque in nervos olfactarios abeunt, posteriores vero, (α) superficiem parumper rugosam habentes, substantia cinerea constant, in qua columnae medullares, ex medulla spinali per totam cerebri longitudinem sese continuantes, in fibras tenuiores disperguntur, ex quibus nervi olfactorii originem suam trahunt.

Media pars (Tab. I. fig. I. II et III. b.) eaque ceteris multo major, geminam in superiore facie exhibet eminentiam, quam primo aspectu pro duobus separatis tuberculis facile quis haberet. Verum enim vero integrum exhibit corticalis substantiae lamellam, quae sulco longitudinali in duos laterales lobos divisa, conchae ad instar interna hujus partis organa tegit. Illa discissâ, in interna ejus facie medullare stratum animadvertisit (Tab. I. fig. II. gg.), in quo fibrae medullares radiatim divergent. Sublata hac lamella, in ventriculo, duo ganglionum paria in conspectum veniunt (k. i.) quae eminentia semicirculare medullaris substantiae cinguntur (h).

In inferiore hujus partis facie observantur: glandula pituitaria (Tab. I. fig. III. o.) conicae formae, rubescens, mollis, eminentiae trigeminæ (n) supraimposita.

Sublata hac eminentia (lobi inferiores Cuv.) origo nervorum opticorum appetet (p), eorumque commissura nec non decussatio. Pone eminentiam trigeminam nervi oculomotorii (3) proveniunt.

Cerebellum esocis lucii, parte media minor, formam ovalem exhibit (Tab. I. fig. I. II et III. c.) atque baseos ad latera processibus est instratum (d); in fundo ventriculi quarti (f), qui ex parte modo a cerebello tegitur, duae observantur intumescentiae.

Medullae spinalis columnae, ante quam in cerebrum intrarunt, parum intumescentes, medullam oblongatam (e) sistunt et ita quidem, ut inferiores, sulco modo sejunctae (Fig. III. m.) qua corpora pyramidalia inferiora appa-

reant; superiores vero, (Fig. II. l.) altera ab altera secedentes, ventriculum quartum amplectantur (Fig. II. f.), atque in cerebellum abeant; haec etiam plus quam illae intumescunt. Ex lateralibus medullae oblongatae partibus ceteri cerebrales nervi oriuntur.

Medulla spinalis formam cylindricam habens per totum columnae vertebralis canalem usque ad caudam sese extendit, ubi, postquam sensim sensimque sese extenuavit, in nodulum desinit, ex quo ultimi caudules proveniunt nervi. Tam in superiore quam inferiore medullae spinalis facie sulcus longitudinalis deprehenditur; superior, inferiore profundior, in ventriculum quartum desiinit; minus distincti sulci etiam in lateralibus medullae spinalis faciebus observantur, qui columnas ejus superiores ab inferioribus separant. (Fig. III.)

Cerebrum aliorum a me sectorum piscium ab hac descripta forma parum recedebat.

In muraena anguilla anteriores lobi tribus nodolorum paribus constant, quorum medii, anterioribus majores, posterioribus vero minores sunt; — medii lobi unum modo ganglionum internorum par continent, cerebellum nullos laterales processus exhibit.

In salmone Wartmanni, *perca fluviatilis* et *cernua cerebrum ei esocis lucii* simile inveni; apud *cottum scorpium* cerebellum parvum, globosae fere formae, sulco longitudinali in duos laterales dividitur lobos. (Tab. I. fig. VI. c.) Similis cerebelli forma apud *pleuronectem flesum* observatur, apud quem lobi olfactorii secundi paris distinctioribus sulcis et gyris praeditam ostendunt superficiem. (Tab. I. fig. VII. a.)

In cyprino tinca et *brama cerebrum* ab jam descriptâ formâ in eo recessit, quod lobi olfactorii ex uno modo nodolorum pari constant, atque sulcos et gyros in superficie sua habent magis conspicuos. Lobi medii, ob insignem ganglionum internorum massam, ceteris multo majores sunt. Substantia cinerea, quae stratum externum hujus partis constituit, non totam illius faciem obducit, relinquit vero spatium quoddam triangulare in posteriore superficii parte, ubi stratum medullare visui appetet. Cerebellum, formae ovalis, processibusque lateralibus destitutum, lobos posteriores (Cuv.) in ventriculo quarto collocatos, ex parte tegit. Lobi hi in *cyprinis* pecu-

liarem ostendunt structuram; constant nimirum ex medio tuberculo (cerebellum secundarium, *Carus*) quod cum quatuor aliis eminentiis cohaeret; harum duae posteriores maioresque, intumescentias parietum vetriculi quarti lateralium sistunt, anteriores vero, crurum ad instar, tuberculum medium cum cerebello uniunt.

In *cyprinis* etiam conarium deprehenditur, quod inter anteriores et medios cerebri lobos in superiore facie situm, saccum vasculosum tenerimum sistit.

Quod medullam spinalem aliorum piscium attinet, haec parum a medulla spinali *esocis lucii* differebat: in *cycloptero lumpo* modo, ea in iis locis, ubi nervi spinales ex ea proveniebant, intumescentias praebebat.

DE NERVIS.

Octo nervorum cerebralium paria apud pisces inveniuntur et quidem: 1) olfactorii, 2) optici, 3) oculomotorii, 4) trochlearis, 5) trigemini, 6) abducentes, 7) auditorii, et 8) vagi — desunt igitur apud illos nervi: faciales, glossopharyngei, hypoglossi et accessorii. (12) Nervi trigemini et vagi apud eos prae ceteris evolvuntur.

Spinalium nervorum numerus apud pisces varius est, nam ab illo vertebrarum pendet, qui, ut opime ex tabula comparativa a *Cuvier* (Leç. d'anat. comp. T. I. pag. 179.) exposita, patet, multum apud pisces variat.

Nunc nervi *esocis lucii* considerandi veniunt.

Nervus olfactorius utriusque lateris (Tab. I. fig. I. 1.) ex anterioribus nodulis, qui jure meritoque propria istius ganglia salutari merentur, or-

12) Nervum faciale modo apud Chondropterygios inveniri cl. *Cuvier* (Leç. d'anat. comp. T. II. pag. 228.) contendit.

Bakker (I. c. pag. 145.) ramulum nervi vagi nomine nervi facialis designat. *Glossopharyngeum* nominat *Cuvier* (Hist. nat. des poissons T. I. pag. 441.) nervum branchialeum primum; quod etiam et *Treviranus* facit. *Nervum hypoglossum* apud cyprinos saltem cl. *Weber* (de aure et auditu) admittebat, serius vero eum nervum cum accessorio comparabat. Ita et *Bischoff* (Nervi accessorii anat. et physiol.) nervum lineae lateralis cum accessorio convenire concedit.

tus, atque e cranii cavo in superiore parte orificii, quod inter ossa frontalia, alas orbitales atque ossa sphaenoidalia anteriora est, (13) substantia que cartilaginoso-fibrosa occluditur, egressus, in proprio canali cartilagineo, inter ambas orbitas ad posteriorem membranae narium faciem procedit, ibique in plures rami divisus, in plicis membranae hujus radiatis desinit. (Fig. I. q.) Sistit ille funiculum integrum rotundum, gracilem, e fibris longitudinalibus constantem. Similis nervi olfactorii forma ac decursus etiam apud alios animadvertebatur pisces, ea cum differentia, ut apud *cottum scorpium* (Tab. I. fig. VI. 1.) ex separatis ille constaret filamentis; apud *cyprinum bramam* vero (Tab. I. fig. V.) atque *gadum callarium* intumescentiam ad anteriorem suam extremitatem preeberet. *Cuvier* (Hist. nat. des poissons T. I. pag. 435.) incrassationem eam apud omnes eos pisces adesse refert, quorum lobi anteriores uno modo constant gangliorum pari, ex quibus nervi olfactorii, sine ulla ad radicem suam intumescentia gangliforme proveniunt. In *squalo catulo* majorem nervi olfactorii intumescentiam deprehendimus, quae, semilunaris formae, cavitate est praedita.

Nervi optici *esocis lucii* ex lobis mediis multis tenerrimis medullaribus filamentis oriuntur (Tab. I. fig. III. p.) atque in inferiore loborum horum facie in conspectum veniunt ut cylindri medullares parumper complanati, qui, commissurae medullaris ope ad radicem ipsam alter alteri unitus, se invicem secant et ita quidem, ut nervus dexter sub illo lateris sinistri dexteriora versus vergente, latus sinistrum petat, sine ulla fibrarum coalitione, nam modo telae cellulosa ope eo in loco, quo decussantur, unus nervus alteri nexus reperitur. Nervus utriusque lateris in inferiore parte spatii inter alas orbitales per proprium orificium e cranii cavo in orbitam egressus, inter quatuor rectos oculi musculos antrorum extrorsumque ad posteriorem scleroticae partem sese dirigit, atque ad interius anteriusque sui latus funiculum tendineum comitatur, cuius ope oculi bulbus orbitae fundo inseritur (Tab. I. fig. I. γ.). Nervus fibris longitudinalibus constans, ubi scleroticam penetrat, non parum constringitur atque in retinam abit; vagina ejus vero, quam a dura matre acceperat, in scleroticam transit.

13) In denominandis ossibus nec non musculis clar. *Cuvier* sum secutus.

In pluribus osceis piscibus nervus opticus, discissâ ejus vaginâ, in lamellam medullarem tenuissimam extendi potest, quae lamella, flabelli ad instar in plicas longitudinales contracta, formam funiculi prae se fert. Lumen tamen eam nervi optici complicationem in *Salmone Wartmanni* observavi (Tab. I. fig. IV.) in quo parimodo ac in *Cycloptero lumpero*, nervus opticus dextri lateris super eum sinistri lateris procedit. Apud *Pleuronectem flesum* sinister opticus nervus sub recto oppositum petit latus, ibique circa olfactarios nervos inflexus, in superiore eorum facie denuo sinistrorum ad superiorem amborum oculorum, in hoc latere sitorum, porrigitur. (Tab. I. fig. VII. 2.)

Apud chondropterygios vero verum nervorum opticorum chiasma observatur; nam ambo optici nervi, in linea mediana coeuntes se invicem secant ac coalescunt, ex quo loco amplissimo arcu divergunt. Secundum E. H. Weber (Meckel's Archiv 1827 II. pag. 317) apud *Rajas* nec non *harengum* alter opticus nervus alterum medium perforat.

Par tertium, nervi oculomotorii incipiunt in inferiore cerebri facie et quidem, pone eminentiam trigeminam, in sulco inter hanc et medullam oblongatam. Cl. Carus nervos istos in *esoco lucio* nec non aliis, usque ad internos posticos lobi medii nodulos persequi potuit, quare nodulos illos ganglia nervorum oculomotoriorum jure appellari posse opinatur. Uterque nervus oculomotorius per proprium orificium in orbitam egreditur, ubi tribus rectis oculi musculis, superiori, inferiori et anteriori nec non obliquo inferiori ramusculos suppeditat. (Tab. I. fig. I. 3. 3. 3.)

Apud alios pisces hi nervi eodem modo sese habent, quod etiam de

Nervis paris quarti valet, qui semper graciles, in lateralili cerebri parte, in sulco inter lobum medium et cerebellum (Fig. I et III. 4. 4.) orti, in musculis oculi obliquis superioribus, uterque in illo sui lateris desinunt.

Nervi paris quinti s. trigemini, qui apud omnes fere pisces multum evolvuntur, oriuntur in *esoco lucio* ad latera medullae oblongatae eo in loco qui lateralibus cerebelli processibus respondet, et quidem supra sulcum lateralem medullae oblongatae, duabus distinctis radicibus (14) altera ante-

(14) In uno exemplari etiam tertia radicula (Tab. I. fig. III. 5.) gracillima, ab

riori, altera posteriori, quarum haec ex parva medullari intumescentia una cum nervo auditorio proveniens, cum illa mox in unum confluit communem truncum, qui anteriora versus tendet, atque adhuc in cavo crani in tres dividitur ramos quorum quivis, per proprium in ala magna orificium e crano egreditur. (Tab. I. fig. I et III. 5. u. v. w.) Consideremus ramos singulos.

I. *Ramus anterior* (Fig. I. u.) (pterygopalatinus Cuv.) ceteris minor, e crano egressus, sub oculi musculis, septi cartilaginei, orbitas alteram ab altera separantis, ad latus antrorum decurrit (1) atque partim in membrana, anteriorem superioremque cavi ovis partem investiente, partim, inter vomerem et os palati egressus, in externis rostri partibus in multis dividitur ramulos.

II. *Ramus medius*, idemque maximus (Fig. I. v.) sub rectis oculi musculis, pone bulbum, exteriora et paululum anteriora versus pergens, in multis dividitur ramos, qui accurati considerari merentur:

1) *ramus nasalis* (ophthalmicus Cuv.) (Fig. I. s. s.) super rectos oculi musculos antrorum porrigitur, atque septum cartilagineum, intra orbitam ac narium cavum situm, penetrans, in membrana naris desinit

2) *r. infraorbitalis s. maxillaris superior* (Tab. I. fig. I. e. z. e; Tab. II. fig. III. a. a.) priori insignior, saepe geminus, sub bulbo oculi anteriora versus flectitur, atque sureulis partibus oculi vicinis, nec non organo olfactorio impertitis, in anteriore rostri parte sub cute, et in cavo oris sub membrana ejus mucosa multis finitur ramulis, qui modo inter se, modo cum ramulis nervi nasalis anastomoses ineunt;

3) *rami musculares*, qui musculis masseteribus prospiciunt; (Tab. II. fig. III. c.)

4) *ramus maxillaris inferior* (T. II. fig. III. d.), maximus, sub musculo massetere serpentino modo ad angulum oris decurrit, ibique ramulos partibus mollibus impertitis, in canali alveolare maxillae inferioris in duos divi-

inferiore medullae oblongatae columna ad nervi trigemini truncum procedere mihi videbatur: forte ob nimiam subtilitatem mihi non contigit, eam in aliis exemplaribus observare.

viditur ramos (e. f.), qui usque ad apicem maxillae antrorum procedunt atque sub interna oris membrana desinunt.

III. *Ramus nervi trigemini posterior* (Tab. I. fig. I. w.) (ramus opercularis Cuv.) in crani adhuc cavo ramuscum mittit retrorsum ad organon auditus, e crano vero egressus (Tab. II. fig. II. m.), surculos dat nervi sympathici ganglio, nec non musculis operculi, aliosque membranae, posteriorem cavi oris partem investienti; postea oblique posteriora versus descendit ad articulationem ossis temporalis superiorem, atque canalem per vium intrat (Tab. III. fig. II. n.) quo os hoc est perforatum. In hoc canali provenit ab illo nervus, quem ego apud alios pisces non observavi; — hic nervus per foraminulum minutum ex posteriore canalis parte egressus ac circa posteriorem marginem processus articularis ossis temporalis extrorsum et antrorum flexus, extremodo musculi masseteris strato tectus, ad oculum procedit (Tab. II. fig. III. g.), sub quo in interna ossis suborbitalis facie in tenerimos dividitur surculos, qui in canales intrant, inter ambas ossis laminas latentes, atque foraminulis quatuor in externa ossis facie hiantes; hic in latice gelatinoso, canaliculos istos implente, desinunt. (15) Postea ramus ille nervi trigemini posterior, e canali egressus (Tab. II. fig. 2. o.), in multos dividitur ramos, quorum major in interna praoperculi facie antrorum flectitur, atque sub inferiore margine lateralium ossis hyoidei ramorum super capitula radiorum membranae branchiostegae ad apicem linguae tendet, sub qua ille desinit. *Bakker* (l. c. pag. 140.) ramum hunc cum hypoglosso comparat, simulque cum intercostalibus, radios branchiostegos pro costas, os hyoideum pro sterno habens.

Ceteri rami vero, in spatio inter praoperulum et posteriorem ossis temporum marginem in externa ossis tympani facie apparent, ibique, surculis ad similes ac in osse suborbitali sinus, inter duas praoperuli laminas sitos substantiaque oleosa praegnantes, impertitis, musculis, his partibus insertis, propisciunt. (Tab. II. fig. III. h. i.)

Pari modo sese habet nervus trigeminus etiam apud alios pisces, cum parva modo differentia.

15) *Bakker* l. c. pag. 143. organa haec pro peculiaribus sensus organis habet.

In acipenser *Güldenstädtii*, rutheno etstellato nervus trigeminus, e crano egressus, in ganglion grisei coloris, tela celluloso-fibrosa densissima involutum, intumescit, ex quo similes ac in *esoco lucio* exeunt rami, quorum vero maximus in inferiore rostri parte, magna adipis copia praedita, in multos dividitur ramos, qui partim in cute, partim in barbillis, usque ad apicem eorum decurrentes, desinunt. E ramo palatino ramusculi proveniunt ad cutis plicam, quae labiorum ad instar oris ambitum cingit. Alius ramus nervum trigeminum cum branchiali primo jungit. Apud *gadum callarium*, surculi a nervo maxillare inferiore ad barbillum, sub media maxilla inferiore situm, procedunt; observatur etiam peculiaris trigemini ramus, qui musculis pinnae thoracicae prospicit; — apud *cottum scorpium* (Tab. I. fig. VI. 5. n. n.), nec non *percam fluviatilem*, trigeminus, adhuc in cavo crani ramulum dat retrorsum, qui per proprium in osse occipitis orificium dum in dorso apparuit, dorsalis pinnae ad latus usque ad posteriorem ejus finem procedit, surculos a spinalibus nervis accipiens. Similem nervum *Weber* (16) in *siluro glani* observavit. In *squalis* multi trigemini rami in cute rostri distribuuntur.

Nervi paris sexti, etiam gracillimi, semper ab inferiore medullae oblongatae parte, sulci longitudinalis inferioris ad latera oriuntur, atque in musculo recto oculi externo desinunt. (Tab. I. fig. I et III. 6.)

Nervus acusticus a lateralibus quarti ventriculi parietibus incipiens, communem, ut jam supra vidimus, cum posteriore nervi trigemini radice habet originem, ita ut pro ramo nervi trigemini a cl. Campero haberetur; dividitur in multos ramos brevissimos ac molles (Tab. I. fig. I. 7. x.) qui in organo auditus desinunt et quidem in sacculo ossiculum continente, nec non in canalibus semicircularibus (Tab. I. fig. I. y.); accipit quoque ramulum communicantem a ramo posteriore nervi trigemini, nec non a vago.

Neque alio modo habebat sese nervus hic apud ceteros a me sectos pisces.

Nervus vagus (Tab. I. fig. I et III. 8.) qui apud omnes pisces, pari modo ac trigeminus, aut etiam potius evolvitur, apud *esocem lucium* e sulco la-

16) *Meckel's Archiv* 1827. VII. pag. 305.

terali medullae oblongatae duabus majoribus separatis incipit radicibus, altera anteriore, altera posteriore, aliisque multo subtilioribus radiculis, quae inter illas ambas maiores ex eodem sulco proveniunt; cunctae radiculae, trunci respectu, admodum sunt graciles, quod etiam de omnibus ceteris nervis valet.

Ab anteriore radice, priusquam illa cum posteriori in truncum confluerat

Nervus branchialis primus. (Tab. I. fig. I et III. z.) (Glossopharyngeus Cuv.) provenit, qui per proprium in osse occipitis laterali orificio egressus (Tab. II. fig. II. b.) atque surculo ganglio nervi sympathici anteriori misso, ad branchiam anteriorem procedit, ubi, impertitis surculis nerveis musculis, superiori arcus branchialis extremitatis insertis, nec non aliis partibus vicinis, in duos dividitur ramos, quorum *exterior* majorque in externa arcus branchialis facie, in sulco ejus, vasa branchialia, ad anteriorem ejus extremitatem comitatur, ibique in musculo branchiae inferiore minuto, ruberrimo desinit; — *ramus vero interior* simili modo in interna arcus branchialis curvatura, in salco decurrit, surculos membranae arcus branchiales investienti impertiens.

Truncus nervi vagi per aliud orificio in eodem osse occipitali laterali, paulo posterius e crano egressus, (Tab. II. fig. II. a.) in ganglion intumescit, e quo, praeter surculum (h) ad ganglion nervi sympathici anterius, multi proveniunt nervi:

1) *Nervus branchialis secundus* — hic nervus, simili modo ac nervus branchialis primus ad secundam branchiam tendit, similes etiam ramulos impertiens.

Eodem modo sese habent

2) et 3) *Nervi branchiales tertius et quartus.* (g)

4) *Rami ad pharyngem,* (f) quorum nonnulli in superiore pharyngis parte desinunt, alii vero pharyngem a lateribus cingunt atque in illius constrictoribus disperiuntur.

5) *Ramus ad diaphragma*, fortasse etiam cordi prospiciens.

6) *Nervus oesophageus,* (e) qui oesophagum in cavum abdominis comitatur, plexumque in ejus facie externa format, qui etiam ad ventriculum propagatur, surculos vesicae natatoriae impertiens.

7) *Nervus lineae lateralis* (c) a posteriore et superiore parte intumescentiae nervi vagi gangliformis proveniens, retrorsum procedit, atque ramulo majore subcutaneo demisso, sub osse scapulare (Cuv.) prorepit. Postea sub linea laterali trunci, in fossa longitudinali qua musculi trunci mediani confluunt, paulo profundius usque ad caudam decurrit, ubi cum nervis spinalibus postremis plexum caudale format: in decursu suo anastomosin, apparentem modo, cum ramulis ab intercostalibus provenientibus, inire videtur; nam ramulorum horum quivis in duos tenuiores finditur, qui in eodem muscularum interstitio ad cutem tendentes, nervum illum lineae lateralis, similes surculos gracillimos ad cutem mittentem, ab utroque latere tantummodo tangunt, minime vero cum eo confluent.

Apud *sturiones*, nervus branchialis primus non est ramus vagi, sed separatum e medulla oblongata oritur, et quidem inter ambas vagi radices quarum posterior, anteriore multo major reperitur; a nervo branchiali primo ramus quoque proveniebat qui eum cum ramo posteriore trigemini uniebat. *Nervus vagus sturionum*, medullae spinalis respectu admodum est crassus, ita ut cl. Baer (2ter Bericht von der anatomischen Anstalt zu Königsberg, pag. 25.) illum apud *acipenserem sturionem* medullam spinalem erasitudine ter superare invenerit, quod etiam de vago apud *acipenserem ruthenum*, *Gueldenstaedtii* et *stellatum* valet. E crano egressus, ille etiam in ganglion insignis voluminis intumescit, quod colore griseo gaudens, densissima involvitur membrana fibrosa, quae a pericranio provenit, nec non a dura meninge. *Nervus lineae lateralis*, in tribus illis speciebus, per totam trunci longitudinem ad caudam usque decurrit, et quidem sub canali eo, qui, cutem modo tectus in ea linea etiam ad caudam prorepit. In *cypriinis*, nec non in *Salmo Wartmanni*, nervus lineae lateralis in media illa massa rubra, adiposo-gelatinosa, quae spatium triquetrum inter portionem muscularum trunci lateralem dorsalem et ventralem explet, procedit, nulla communicatione cum ramulis cutaneis nervorum intercostalium in hoc spatio ad cutem pergentibus, existente; nam ramuli hi massae illius rubrae ad latera, inter illam et musculos prorepunt, nervo lineae lateralis illam medianam penetrante. Cuvier (hist. nat. des pois. T. I. p. 443.), in multis piscibus nervum lineae lateralis cum spinalibus communicare contendit.

In cyprinis, nervus vagus, praeter ramos qui iis apud *esocem lucium* respondent, alios etiam suppeditat ramos numerosissimos, qui omnes massam mollem, palato insertam, papillasque in sua superficie exhibentem intrant in eaque ramificantur. (Tab. II. fig. I. b. b.) Cl. Rathke. (Ueber den Darmkanal und Zeugungsorgane der Fische, pag. 2.) cl. Meckel (Handbuch der vergleichenden Anatomie. Bd. IV. pag. 214.) massam eam pro organo secretorio habent; cl. Cuvier (Leçon d'anat. compar. T. III.) similem quoque de hoc organo habuit opinionem; serius vero (Histoire naturelle des poiss. T. I. pag. 477.) sententiae eorum, qui massam hanc tamquam verum gustus organon agnoscunt, non alienus esse videtur; magnam hujus organi irritabilitatem ante oculos ponens. De vera hujus organi significatione dijudicare non ausim. In cycloptero lumbo, nervum lineae lateralis frusta quaesivi; adest ille vero apud apicenserem sturionem (Baer I. c. pag. 25.) in quo cl. Desmoulin (Meckel's Archiv. Bd. VII. pag. 567.) eum quoque deesse contendit; in cotto scorpio nervus lineaë lateralis immediate sub cute proreperit, atque ego eum modo in anteriore trunci parte persequi potui. In squalis nervus vagus ramum mittit, qui cum anterioribus spinalibus nervis ad thoracicas pinnas procedit. In perca fluviatili, sternua, ramulus a vago ad ramum dorsalem trigemini procedit atque cum illo confluit, aequo ac in cotto scorpio. (Tab. I. fig. VI. t.)

Nervi spinales esbcis lucii, aequo ac omnium ceterorum piscium duabus tenuissimis incipiunt radicibus, una superiore, altera inferiore, quorum illa nodulo minuto scatet; a truncos cuiusvis nervi spinalis proveniunt surculi ad sympatheticum, nec non ramuli ad lineam lateralem, quos jam supratetigimus; (pag. 21) etiam surculi cum nervis paris sequentis communicantes; — postea truncus in duos dividitur ramos, dorsalem et abdominalem; — rami dorsales, processuum spinosoram vertebrarum ad latera, sursum porriguntur, musculisque dorsi prospiciunt; abdominales vero deorsum vertuntur ac inter costas, in posteriore vero trunci parte processuum spinosorum inferiorum ad latera, ad inferiorem trunci tendunt partem, pari modo musculis nec non pinnis prospicientes.

Nonnulla modo spinalium nervorum paria speciatim commenoremus, necesse est; — de ceteris sufficient, quae jam monuimus.

Par primum in cavo adhuc cranii, a medulla oblongata proveniens (a nonnullis cerebralibus adnumeratur nervis) per orificium in osse occipitali laterali exit; atque surculis ad sympatheticum nervum, alioque majore ad musculos dorsales misso, cum ramo abdominali s. intercostali paris secundi in unum communem confluit truncum, qui anteriora versus ad humerum procedit, ibique surculo ad os hyoideum misso, musculis artus anterioris prospicit, nonnullosque ramulos dat in pinnae radios sese propagantes.

Par secundum, ut jam vidimus majore ex parte pinnae thoracae prospicit. Similes nervi etiam ad pinnas abdominales porriguntur.

Cetera nervorum spinalium paria nihil peculiari exhibit. Postremum modo par, missis surculis ad musculos caudalis pinnae, unâ cum nervo lineae lateralis plexum caudale formant, ex quo ramuli in latice oleoso, spatium inter ambas radiorum caudalium lamellas implente, cum teneris vasis contexuntur, surculos singulis radiis impertinentes.

In cotto scorpio, pinnae anterioris nervi, e quatuor spinalium nervorum paribus provenientes, insignem habent magnitudinem, atque multos ramulos pinnae radiis suppeditant, quos ego usque ad apicem radiorum persequi potui, pari modo ac in cycloptero lumbo, apud quem etiam scutae discoideae musculi surculos ex eodem plexu brachiali accipiunt. In rajis viginti quatuor nervorum spinalium paria, pinnis pectoralibus nervos suppeditant, (Carius Lehrbuch der Zootomie pag. 305.) et decem modo abdominalibus.

DE NERVO SYMPATHICO.

Nervus sympathicus apud *esocem lucium* funiculum exhibit gracillimum, qui in anteriore parte surculo tenuissimo a posteriore nervi trigemini ramo (Tab. II. fig. II. k.) incipit: surculus ille in cranii basi oblique deorsum et retrorsum descendit, atque ramulis similibus a branchiali primo, ipsisque vago, acceptis, in ganglion planum, triangulare, duriuscum, semipellucidum (i) intumescit, e quo praeter truncum nervi sympathici multi tenerrimi oriuntur nervuli qui vasa sanguifera majora comitantur. Truncus nervi sympathici saepe ex geminis constans surculis, accepto ra-

musculo a primo nervorum spinalium pari, cavum abdominis sub anteriore renis extremitate intrat, ibique corporum vertebrarum ad latera, a quovis spinalium nervorum pari surculos accipiens, procedit, atque ramuscules gracillimos vasis nec non visceribus suppeditat, qui plexus varios formare juvant. Ganglia, praeter jam descriptum, in trunco nervi sympathici non observantur. Majores plexus sunt: oesophageus, qui majore ex parte a vago originem dicit, parimodo ac plexus vesicæ natatoriae; alii vero, ut plexus renalis, et spermaticus a solo sympathico provenire videntur, — ramulos vero ad alia organo ob nimiam eorum subtilitatem persequi non potui. In *sturionibus* cephalica nervi sympathici portio, extra craniī cavum non observatur, et cl. Baer eam apud acipenserem sturionem etiam non invenit, nervumque sympatheticum totum plexu quodam renali compensari putat.

In *cycloptero lumpo* ganglia parvula etiam in trunco nervi sympathici, ubi ramulos a spinalibus accipit observavi.

Cuvier (Hist. nat. des pois. T. I. pag. 438.) apud gadum morrhuam communicationem nervi sympathici cum parisi sexti nervo observasse credit.

Postquam centralia systematis nervi apud pisces organa, nervosque consideravimus, nonnulla de hoc systemate in universum referamus necesse est.

Cerebrum piscium respectu totius systematis nervi admodum est exiguum, atque tantum abest ut medullam spinalem ponderis ratione superet, ut potius ab illa supereretur, quae ipsa nonnunquam nervis, quoad massam, cedit. Nonne ex his ad minorem centralium systematis nervi organorum evolutionem concludere liceat; nam contraria apud perfectiora invenimus animalia. Sed et ipsa cerebri structura hanc imperfectiorem ejus organisationem testatur, nam ex separatis nodulis constans, intumescentiasque insigniores iis in locis, ubi majores ex illo exeunt nervi, exhibens, caret illud arctiore eo singularum partium nexu, quem in cerebro animalium perfectiorum admirari solemus, atque potius tanquam gangliorum in uno loco collectorum complexus quam ut centrale organon, nobilissimas vitae animalis functiones regens, considerandum esse videtur. Prae ceteris vero mira

nobis videtur inconstantia illa, quoad singularum partium evolutionem, eorum formam, nec non numerum. Ita in *muraenis* anterior cerebri pars ex tribus nodulorum paribus constat; in *rajis* anterior integerque lobus omnes ceteras cerebri partes superat atque cavitatem continet. Apud plures vero osseos pisces, partem medianam, quam nos loborum opticorum nomine designavimus, prae ceteris non solum volumine, sed etiam interna perfectiore structura praevalere vidimus. Non raro posteriores quoque lobi magis compositam ostendunt fabricam, ut in *cyprinis*.

Sed et optici lobi non apud omnes pisces eandem ostendunt internam structuram; ita in chondropterygiis, qui organisationis ratione prae ceteris piscibus, animalibus perfectioribus propius accedunt, desiderantur interna illa mediae partis organa, quae apud *clupeam harengum* quam maximam cum internis organis in hemisphaeriis apud mammalia praebent similitudinem.

Praesente tali, tantaque in conformatione singularum cerebri apud pisces partium inconstantia, ut veram illarum analogiam cum iisdem cerebri mammalium organis, stabiliamus, a cerebello proficiscamur necesse est; nam hoc organon, ventriculo medullae oblongatae suprapositum, etiam ob formam suam, ut analogon cerebelli apud mammalia facile agnoscitur. Quod vero analogiam ceterorum cerebri partium attinet, illa non parum difficultatis praebet.

Cum quanam nimirum mammalium cerebri parte lobos opticos piscium comparabimus? Multi auctores, ut Camper, Treviranus, nec non ipse Cuvier, in parte hac, quae multa interna continet organa, iis in mammalium hemisphaeriis obviis, non dissimilia, — mammalium hemisphaeriis analogon admittere malunt. Alii vero, ut Serres, Arsaky, Desmoulin, Carus cet., piscium cerebrum, cum fetuum mammalium cerebro comparantes, partem hanc non nisi tubercula quadrigemina magis evoluta esse contendunt; pro hac opinione pugnare videntur: nervi optici ex hac parte origo; — apparenz cerebri piscium cum eo fetuum mammalium, quoad formam similitudo; nam in hoc, pariter ac in illo, anterior pars, ex qua hemisphaeria sese evolvere solent, minima est; media vero, tuberculorum quadrigeminorum primordium, anteriore major, cavitatem continet; porro etiam cerebri apud chondropterygios conformatio eadem probare videtur; nam anterior illius

lobus nervo olfactorio originem praebens, ceteros volumine et massa multum superat, atque jam ventriculum continet, quo ipso analogia ejus cum hemisphaeriis mammalium manifestari ab iis, qui huic opinioni favent, dicitur. Neque conarii apud *Cyprinos* inter anteriorem et medium cerebri partem situm contra hanc opinionem pugnare, facile quis contenderet. Quoad alteram vero, cui *Camper*, *Treviranus*, *Cuvier* aliique accedunt, opinionem, secundum quam media nimirum piscium cerebri pars pro veris hemisphaeriis habetur, illa praecipue nititur magis composita hujus partis interna structura atque haud parvâ, quae inter organa, in cavitate hujus partis collocata, et inter illa hemisphaeriorum mammalium observatur, analogia. Praeterea *Cuvier* (*Histoire des poiss.* T. I. pag. 428 et seq.) quae ad probandam contrariam opinionem relata erant argumenta, ingeniose refutare studet, et quidem *primo*: comparando anteriores piscium cerebri lobos cum lobis olfactoriis hemisphaeriorum mammalium, qui simili modo nervis olfactoriis originem praebent ac saepe profundo a cetera hemisphaeriorum massa separantur sulco; — *secundo*: simili apud reptilia nonnulla cerebri fabrica, quorum hemisphaeria lobis mediis piscium cerebri simillima, eadem interna continent organa; ante haec hemisphaeria vero, lobi olfactorii, ac pone illa, tubercula optica, cava observantur; — *porro*: eo, quod analogia inter cerebrum apud embryones mammalium, atque illud piscium modo apparet est, nam hemisphaeriorum rudimenta apud illos cava observantur, tubercula quadrigemina vero organis internis carent.

Harum opinionum quaenam verosimilior sit, dijudicare non audeo, neque ullam necessitudinem urgere video, ut ad eam vel alteram earum accedam. Nonne natura, quae, tam dives; minime easdem in toto animale regno creando secuta est leges, etiam in piscium cerebro, mediae parti, quae tuberculis quadrigeminis apud embryones mammalium responderet, magis composita interna structura concessâ, ei hemisphaeriorum apud mammalia munus imponere potuerit?

Sed etiam de imperfectiore cerebri piscium fabrica in universum non est quod miremus; nam systema nerveum quod, in perfectioribus saltem animalibus, totum organismum, ut ita dicam, penetrat; quod omnibus organismi functionibus praeesse observatur, — cum ceteris systematis tam arcte est

nexus, ut his sese mutantibus, ipsum mutetur. Organismum vero, etiamsi microcosmus dicitur, a rebus externis haud parum pendere, nemo negabit. Ita varia, in quibus animalia vivunt, media, varius sese nutriendi modus, aliaeque res ad vitam necessariae, variam etiam exigunt organisationis indolem, varium organorum numerum, variamque eorum mutuam rationem. Pisces vero multo aliam vivendi rationem manifestant, quam cetera vertebrata animalia. Hanc ob rem et organisatio eorum multo alia est, quod egregie cl. *Cuvier* (*Histoire naturelle des poissons*. T. I. pag. 277 et seq.) enarravit. Praecipue vero animalis piscium vita minimam ostendit energiam; atque non possum quin clar. *Cuvier* verba de hoc arguento hic referam: „L'habitant des eaux au contraire ne s'attache point; il n'a point de langage, point d'affection; il ne sait ce que c'est que d'être époux et père, ni que de se préparer un abri; dans le danger il se cache sous les rochers de la mer, ou se précipite dans la profondeur des eaux; sa vie est silencieuse et monotone, sa voracité seule l'occupe, et ce n'est que par elle qu'on peut lui enseigner à diriger ses mouvements par quelques signes venus du dehors“ (pag. 281.) — et alio loco: „Les sens extérieurs des poissons leur donnent peu d'impressions vives et nettes; la nature qui les entoure ne doit les affecter que d'une manière confuse, leurs plaisirs sont peu variés; ils n'ont de souffrances à craindre du dehors, que les douleurs produites par les blessures effectives. Leur besoin continual, celui qui seul hors de la saison de l'amour les agite et les entraîne, leur passion dominante enfin, doit être d'assouvir le sentiment intérieur de la faim; dévorer est presque tout ce qu'ils peuvent faire, quand ils ne se reproduisent pas; c'est uniquement vers ce but que semblent calculés toute leur structure, tous leurs organs du mouvement. Poursuivre une proie, ou échapper à un destructeur, font l'occupation de leur vie etc.“ (pag. 277.) Ex his jam patet cerebrum apud pisces, quod organon vitae animalis sistit primarium et unicum, illâ tam parum evolutâ, etiam in infimo evolutionis gradu manere debuisse.

Quod nervos piscium cerebrales attinet, illos magnam cum iis mammalium similitudinem praebere vidimus. Ita nervi olfactorii simili modo in membrana, peculiaria organa cava insertiente, atque multis plicis praedita, disperiuntur; cl. *Carus* ea potius organa gustus, quam olfactus esse dicit, nam

substantiis non aëris formibus, sed fluidis afficiuntur. *Muraenae*, quae facultate gaudent extra aquam longius tempus versari, etiam tria olfactoriorum nodolorum paria habent.

Nervorum opticorum apud pisces decussatio, nostra multum interest, nam hic luculentissime patet, adesse fibras, quae e cerebro, obliquo tramite ad oculum oppositi lateris pergunt; alias, quae ambos opticos nervos commissurae ad instar uniunt.

Nervos paris 3tii, 4ti et 6ti silentio praeteribo, nam simili modo ac in homine oriuntur et iisdem oculi musculis prospiciunt. Horum nervorum munera egregie illustravit *Carolus Bell* (vide physiologische und pathologische Untersuchungen des Nervensystems — aus dem Engl. von M. H. Romberg. 3te Abhandlung, pag. 143 et seq.)

Nervus trigeminus (17) piscium ex lateralibus medullae oblongatae partibus et quidem sub sulco laterali proveniens pro nervo sensifero rite haberi potest, quod etiam ex ramorum ipsius in tegumentis tam externis capitis, quam internis oris distributione patet: mittit quoque nervum auxiliarem ad organon olfactus, similemque ad organon auditus. Sed parimodo ac apud mammalia ramulos motorios musculis masseteribus suppeditat, quod ex accidente radicula tenuissima ab inferioribus medullae oblongatae columnis, quam modo semel in *esoce lucio* observavi, — explicari posset.

Nervus facialis deesse debebat, nam desunt musculi faciei, qui nervi facialis sub influxu varios animi status exprimere valent, nec non in actu respirationis exaltato participare solent. (*Carol. Bell* l. c. pag. 56 et 74.)

Nervus auditorius ab eo mammalium non differt. Deficiente lingua, tamquam vero gustus organo desunt et nervi ad eam pertinentia, glossopharyngeus nimirum et hypoglossus; nisi ramos vagi apud *Cyprinos* organo illi peculiari prospicientes pro nervis gustatoriis habere velles.

17) De nervo trigemino vide etiam apud *Carol. Bell* l. c. pag. 54 et 80, ubi ille quam optime probavit nervum trigeminum mere sensitum esse, atque ramos musculares nonnisi ex ejus inferiore radicula provenire, cujus fibrae, extra ganglion gasserianum cui illae modo adjacent, cum nervo maxillare inferiore junguntur.

Nervus vagus vero, qui secundum *Carolum Bell* systemati nervorum respiratoriorum adnumerandus est, etiam in piscibus provenit inter superiores et inferiores medullae oblongatae columnas, qualem originem *Bell* omnibus systematis respiratorii nervis communem esse contendit. Prospicit ille organis respirationis, simulque iis deglutitionis nec non digestionis; ob peculiarem vero respirationis modum, organa hujus systematis aliter formata atque alibi sita quam in mammalibus observantur; hanc ob causam et nervus vagus alio modo sese habet, sed quoad functiones ipsius, ille nullatenus ab eo mammalium differt.

Nervus lineae lateralis tantummodo, in piscibus solis occurrentis, parem sibi apud alia vertebrata non habet. *Weber* eum nervum muscularem esse putat (*Meckel's Archiv* 1827. pag. 305.) Falso cl. *Cuvier*, ut jam in describendo hoc nervo monui, atque *Weber* aliipue probarunt, eum surculos a spinalibus accipere nervis refert. Nam ille modo cum cute aut cum canale illo, qui sub cute in linea laterali decurrit, gracillimus surculis communicat, atque unâ cum nervis caudalibus plexum formare solet, quem jam supratetigimus. Quo officio nervus hic in oeconomia piscium animali fungatur, adhuc non innotuit. *Desmoulin* eum nervum respiratorium esse jam suspicatus est — quae opinio mihi quoque verosimilis videtur. Ceterum, ut de hac re certi quid colligamus, pericula in vivis piscibus instituamus, necesse est.

Nervis spinalibus piscium ob binas radices, alteram ex superiore, alteram ex inferiore medullae spinalis columnâ, etiam binae concedendae sunt facultates: sentiendi nimirum et movendi.

Ubi ad pinnas tendunt, plexus formare solent et co insigniores, quo maiores sunt motus organa.

De nervis vitae animalis in universum dici potest, eos respectu centralium systematis nervei organorum, insigni crassitie gaudere, neque in tam numerosos surculos dividi sed in massam potius pulposam transire.

Systema nerveum functionibus vitae vegetabilis praesidens, apud pisces, ut jam vidimus, nervo sympathico imbecilli, saepe nullis distinctis gaudente ganglii representatur, e quo gracillimi surculi, vix conspicui, varia organa adeunt. Caret hoc sistema organis suis centralibus, quo fit ut *Treviranus*

(l. c. pag. 121.) nervum sympatheticum vitae animalis sub imperio esse putet, Weber vero (Anatom. compar. nerv. sympathici pag. 77.) nervum vagum nervi sympathici vices gerere opinetur.

TABULARUM EXPLICATIO.

TABULA I.

Figura I. Caput esocis lucii nobis sistit, cranio aperto, ita ut cerebrum cum nervis ex eo provenientibus, visui appareat.

- a. Nodulus olfactorius anterior dextri lateris.
- a. Nodulus olfactorius posterior ejusdem lateris.
- Noduli sinistri latoris, cum portione nervi olfactorii remoti sunt, ut nervus opticus dextri oculi in conspectum veniat.
- b. Lobi medii.
- c. Cerebellum.
- d. Appendices ejus laterales.
- e. Medulla oblongata.
- f. Ventriculus medullae oblongatae.
- 1. 1. Nervi olfactorii. q. Eorum in posteriore narium facie distributio.
- 2. N. opticus.
- 3. 3. N. oculomotorius, ejusque rami.
- 4. 4. N. n. trochlearis.
- 5. 5. N. n. trigemini.
- u. Ramus anterior.
- t. Ejus in orbita continuatio.
- v. Ramus medius.
- s. s. N. nasatis.
- z. z. Rami maxillares superiores.
- 6. N. abducens.
- 7. N. auditorius.
- x. Rami ad labyrinthum.
- y. Rami ad canales semicirculares.
- 8. N. vagus.
- z. N. branchialis primus.
- δ. Truncus nervi vagi.
- r. r. r. N. n. spinales duabus radicibus ex medulla spinali provenientes.

Figura II. Cerebrum esocis lucii, in quo media pars est discissa et aperta, ut interna ejus tubercula visui appareant.

- aa. a. b. c. d. e. f. t. Eandem habent significationem ac in figura I.
- g. Interna tegmenti ventricularum facies, in qua fibrae medullares, radiatim dispositae facile observantur.
- h. Eminentia semicircularis nodulos cingens.
- i. k. Ambo nodulorum internorum paria.
- l. Corpora restiformia.

Figura III. Cerebrum esocis lucii ab imo et paululum a latere visum.

- aa. a. b. c. e. 1. 2. 3. 4. 5. 6. 7. 8. z. δ. Eadem significant ac in figura I.
- m. Corpora pyramidalia, inferiorum medullae spinalis columnarum continuatio.
- n. Eminentia trigemina.
- o. Glandula pituitaria.
- p. Nervi optici origo.

In hac figura etiam inferioris nervi trigemini radicula, gracillima, distinguitur, par modo ac tenuiores mediae nervi vagi radiculae, quae una cum ambabus majoribus, anteriori nimis et posteriori, a sulco inter superiore et inferiore medullae oblongatae columnas proveniunt.

Figura IV. Nervi optici Salmonis Wartmanni, vagina sua destituti.

Figura V. Nervi olfactori cyprini bramae.

Figura VI. Cerebrum Cotti scorpii cum nervis.

- aa. a. b. c. e. 1. 2. 3. 4. 5. Easdem partes designant ac in fig. I.
- η. η. Ramus dorsalis n. trigemini.
- θ. Ramulus ejus a vago.

Figura VII. Cerebrum pleuronecteos flesi; 2. nervus opticus sinistri lateris.

TABULA II.

Figura I. Nervi vagi in cyprino brama distributio.

- a. Truncus communis nervi vagi.
- b. Ramus vagi anterior, anteriori organi peculiaris palatini parti providens.
- c. Rami eidem organo prospicientis.
- d. Ganglion ex quo proveniunt:
- e. N. n. branchiales.
- f. g. h. N. n. ad diaphragma, ad constrictores pharyngis, ad oesophagum.
- i. i. Organon illud peculiare, palato insertum.
- k. k. k. Massa adiposo-gelatinosa, in linea laterali sub cute a capite usque ad caudam collocata, in qua media:
- l. Nervus lineae lateralis decurrit.

Figura II. Ramos nervi vagi in esoce lucio exhibet, nec nervi sympathici portionem cephalicam.


- a. Truncus communis n. vagi.
- b. N. branchialis anterior.
- c. N. lineae lateralis.
- d. Ganglion ex quo proveniunt:

- e. *N. oesophageus.*
- f. *N. pharyngeus.*
- g. g. *Ceteri n. n. branchiales.*
- h. *Surculus a nervo vago ad ganglion nervi sympathici.*
- i. *Ganglion nervi sympathici.*
- k. *Ramulus nervi sympathici a n. paris quinti.*
- l. l. *N. sympatheticus in cavum abdominis descendens, surculosque vasorum sanguiferis majoribus impertiens.*
- m. *Ramus posterior trigemini.*
- n. *Canalis osseus in interna ossis temporalis facie, quem n. iste intrat.*
- o. *Rami posterioris continuatio.*

Figura III. Nervi trigemini esocis lucii in externis capitis partibus distributio.

- a. a. a. *N. n. maxillares superiores.*
 - b. *Ramulus ait nares.*
 - c. *Ramus muscularis.*
 - d. *N. maxillaris inferior.*
 - e. *Ramus ejus superior.*
 - f. *Ramus inferior.*
 - g. *Nervus a posteriori trigemini ramo, in canali ossis temporum proveniens, atque in sinubus ossis suborbitalis desinens.*
 - h. *Posterioris nervi trigemini rami continuatio.*
 - i. *Foramina in osse praeperculari, cum sinubus hujus ossis communicantia, in quibus, aeque ac in osse suborbitali, surculi nervei a posteriore nervi trigemini ramo provenientes desinunt.*
-

Tabula I.



auf Stein gez. v. Lithogr. F. Schlater

Tabula II.




Fig. I.




Fig. II




Fig. III

